

Bakdou miz go faexgeq ndeu, lumjbaenz boux daxgoeng nei dingh-dingh dwk soengz youq baihrog bakdou. Rag gofaex cap roengz lajdeih bae laegmbub, rumz bongj ngefaex caeuq mbawfaex, daengngoenz haenq-haenq dwk ciuq roengz byaifaex daeuj. Go de couh baenzneix soengz dwk hen dwk, cin bae cou ma, de ciuqyiengh dwg baenzneix.

Gou lij iq seiz caeuq daxboh doxhaemz dawzcaeuz gvaq, doxboh couh lumj ndaek rin caepcat he, gou cibfaen lau depgaenh de. De singq gig gaep, geiq ndaej mwh lij iq, aenvih gou dwk boeg deb byaek ndeu, daxboh coenz he cungj mbouj gangj, doq gaem dawz diuz faexdonh he mboengj gou. Yaepyet, naengnoh gwnzndang gou doq hwnj geij diuz laenznding. Gou nyaenx raemxda dwk, mbouj hawj raemxda rih okdaeuj, ndawsim haemz dangqmaz. Daxboh mboengj baeg lo cij naengh gvaq henz bae yietnaiq. Mwhde, daxmeh menhmenh byaij gvaqdaeuj, gou doq bongh haeuj rungj daxmeh bae daejnganga, daxboh cix naengh youq baihhenz, bak gamz ci ien ndeu cit boebbboeb.

Lai baez deng daxboh mboengj dwk naeng laenz gawh in, ndawsim gou gag ngeix, gou dauqdaeuj dwg mbouj dwg de caenseng? Ngoenz riengz ngoenz bae, aen singq lij mbouj gaijbienq saek di. Baez ndeu, de naengh youq gyaeujmbonq cit ien boebbboeb. “Mwngz ngoenz daengz

·ganqjgoj·

Gij Gyaez Daxboh Naek Gvaq Bya

父爱如山

□ Luj Sauh

haemh cungj mbouj hawj gou soeng saek di, gou haemz dai mwngz lo……” Daxboh gaet faenz maenij heuj dwk naeuz. Daxmeh youq henz mbouj gamj gangj saek coenz vah, raemxda cix doek mbouj dingz.

Laxlawz, daxmeh vih ceng gvaengh reih ndeu ndaem byaek, caeuq ranzhenz ciengzseiz doxceng. Daxmeh dwg boux vunz goq hokranz he, yawj gvaengh reih neix dangq diuzmingh. Dahnseih daxboh cix gencueg goz dauq rog, bang vunz ranznden fok ndaq daxmeh. Daxmeh gamjdaengz gig ienqhoij, baenzneix ceng mboujdanh mbouj ndaej maz ndei, dauqlanj deng daxboh fok ndaq can he. Daxmeh daejsoebsoeb, naeuz: “Mwngz gaej ndaq gou lo, gou hix mbouj rox gou lij gyaeu ndaej geijlai bi dem……” Daxboh mboujcaiq ndaq,

gou gaem dawz fwngz daxmeh, raemxda nyaenx mbouj ndaej gag rih rim naj.

Daxmeh bi’ ndwen geq lo, ciengzseiz gvaqniemh gou, gek samhaj ngoenz couh heuh gou baema ranz. Gou ngamq daengz bak douranz seiz, go faexgeq lumjnaeuz yiengq gou ngaek gyaeuj vad fwngz nei. Gwn caeuz seiz, gou bang daxboh daek vanj haeux ndeu caemhcaiq nip byaek hawj de, de yienznaeuz najmong, doiq gou hix mbouj lumj gaxgonq yienghhaenx yiemzleih lo. De naengh youq henz daiz cit ien boebbboeb, gou hix mbouj lanz de, caeuq de bungq boi laeuj ndeu, caegcaeg yawj de baenzlawz yiengh……Geij bi mbouj raennaj de lo, gou hix mboujcaiq lumj gaxgonq yienghneix haemzndaenq de lo. Gou youq rogdieg gunghcoz samcib lai bi,

sawqmwh mingzbeig daxboh vih ciengx ranz vunz ndeu gvaq ndaej geijlai sinhoj. Gwndaenij atlig, hawj daxboh mbouj ndaej mbouj doiq lwg yiemzgek son’ gyauq. Gou hix gag yienzliengh daxboh lo.

Gou siengj, youq aen seizdaih hojndiq haenx caen mbouj rox daxboh baenzlawz ngaiznyed gvaqdaeuj. Vunz mbouj dwg faex haz, byawz mbouj simcieg ne? Cijdwg, gij gyaez daxboh naekcaem lai, gou lijgaij de hix dwg laeng di lo.

Daxboh, mwngz geijlai bi gvaqdaeuj, vih ciengx mingh daengx ranz vunz, yungh aen mbaq mwngz rap hwnj daengx ranz maqmuengh, couh lumj go faexgeq bak douranz, youq ndaw rumz dongj fwn rwed giendingh dwk soengz youq. Ci ien ndaw fwngz de, couh lumj boux baengzyoux geq ndeu, youq haemh mbouj miz ronghndwen mbouj miz ndaundeiq haenx, dinghdingh dwk ngeng rwz dingq goenggeq he lwnhgangj gij goj ciuhvunz de.

Seizneix, yawj coh rog cueng, go faexgeq lij soengz youq gizde, gou fwngz gaem ci ien ndeu, hag gij yiengh daxboh mwhhaenx, boq ok gien doek gien hoenzien. Ndwenggoenz lumj raemx lae, faexgeq did mbaw moq, gou gingq ciuq bwn’ gyaeuj, bwn’ gyaeuj gingqyienz hix hau liux lo. Lij miz gijmaz banhfap dem? Cij miz raemxda buenx gou cixbah lo.

Swngghoz Dwg Mwngz Swhgeij Caux Ok 生活是你自己创造的

Miz boux canghfaex ndeu laux lo, de caeuq lauxbanj de gangj de yaek lizhai hangz gencuz, dauqbae ranz caeuq yah, lwg de itheij gvaq saedceij bingz- ciengz.

Boux lauxbanj de yienz-naeuz sij mbouj ndaej boux canghfaex laux dinfwngz ndei neix lizhai, hoeng, hix cijdwg cam de ndaej mbouj ndaej bang guh aen ranz he dem caiq bae, boux canghfaex laux neix doengzeiq lo. Doeklaeng, caezgya cungj yawj ok sim de caeux couh mbouj youq gij hong lo, de yungh gij faex mbouj ndei, guh hong hix simco. Daengz aen ranz neix guh baenz seiz, boux lauxbanj de hawj fag yaekseiz aen ranz neix hawj de dawz.


“Aen ranz neix doeklaeng couhdwg aen ranz mwngz”, boux lauxbanj de naeuz, “Gou soengq hawj mwngz.”

Boux canghfaex laux neix doeksaet caez, najhoengz dangqmaz. Danghnaeuz de caeux di rox aen ranz boux lauxbanj de heuh de guh couhdwg guh hawj swhgeij youq, de baenzlawz rox yienghneix guh ne? De itdingh rox lumj gaxgonq nei yunghsim bae guh ranz. Couhdwg aenvih nyinhnaeuz aen ranz neix dwg de ceiqlaeng guh aen he lo,

ndigah mbouj baenzlawz nyinhcaen. Seizneix de deng youq haeuj aen ranz vaih-vadvad he lo!

Gizsaed raeuz hix lumj boux canghfaex neix dox-doengz. Dou mbouj cizgiz bae guh saeh, cungj dwg siuhgiz dwk doiqdaih, gijmaz saeh cungj dwg mbouj haengi guh ndei liux caiq aeu ndei, youq youqgaenj seiz mbouj ndaej yienh’ok rengz cei q hung. Daengz raeuz gamjdaengz hingzsi mbouj deng seiz, raeuz caeux deng homh youq ndaw aen ranz swhgeij gag guh haenx.

Ndigah, siengj swhgeij baenz boux canghfaex neix, siengjsiengj aen ranz mwngz cingq guh haenx, moix ngoenz mwngz roq haeuj diuz ding ndeu, dem hwnj gep benj he, roxnaeuz caep hwnj faq ciengz he, yungh raemxhanh mwngz ndeindei bae guh aen ranz mwngz ba! Swngghoz mwngz dwg doxgaiq ciuh neix mwngz caux ok dog, mbouj ndaej uet bae caiq guh baez ndeu, couhcinj cijmiz ngoenz he ndaej lix, ngoenz haenx hix wnggai lix ndaej coenz vah neix——swngghoz dwg mwngz swhgeij caux ok.



Mbanj Myauzcuz seizcin gomiuz maj ndaej heuswd.



Miz ngoenz ndeu, Daegcieng youq gwnz roen ndaw bya haici. De cingq menhmenh yawj funghgingj henz roen seiz, sawqmwh doiqnaj hai daeuj aen ci cang huq he, bouxhaici heuj ndaemrad haenx lij ngauz aen cueng ci roengzdaeuj doiq de hemq: “Mou!”

Daegcieng yied siengj yied hozndat, yienghneix de hix ngauz roengz cueng ci de nyieux gyaeuj hut: “Mwngz cij dwg mou!” Byawz rox de cij ngamq hut liux, couh yawj daengz bang mou cingq gvaq roen bae.

Mbouj aeu gejloeng simndei bouwnq, yienghneix cij rox hawj swhgeij gwnvi, caemhcaiq lij hangz bouxwnq. Youq mbouj rox dwg maz cingzvang seiz, yaek hag rox nyaenx roengz ndatheiq, naihsim bae yawj, yawjyawj miz maz saehcingz fatseng liux caiq guh ok hengzdoengh doxwngq, mienx ndaej guh loeng liux youh ienqhoij.